

खबरां

- राष्ट्रपति द्रौपदी मुर्मू होरें गोरखपुर च उत्तर प्रदेश दे पैहले महायोगी गुरु गोरखनाथ आयुष विश्वविद्यालय दा उद्घाटन करगन।
- रेल मंत्रालय नै यात्रा कराएं च दना क बाद्धा कीता ऐ, एसी क्लास च एह बाद्धा दुक्की यानि दो पैहे फही किलोमीटर होग, सैकंड क्लास च 500 किलोमीटर जोड़ी कराएं च कोई बाद्धा नेई कीता गेआ।
- मौसम विभाग नै इस ब'रे जुलाई महीने मुखे च ओसत बरखा सामान्य कोला मती रौहने दी मेद जताई ऐ।
- हिंद प्रशांत क्षेत्र चसमुंद्री सैहयोग दी इक रणनीतिक पैहल च भारत, जापान, अमरीका ते आस्ट्रेलिया दे तटरक्षक बलें दा पैहला समुंद्री मिशन शुरू कीता गेआ ऐ।
- विदेश मंत्री डॉ. एस.जयशंकर होर अज्ज वाशिंगटन च क्वाड मुखें दे विदेश मंत्रिणं दी बैठका च शामिल होंगन।
- विद्यार्थिणं च फुटबाल लेई दिलचस्पी पैदा करने ते खेड्डें च बढ़ावा देने लेई स्कूलें च 10 लक्ख फुटबाल बंडे जांगन।

<><><><><><>

President

राष्ट्रपति द्रौपदी मुर्मू होर अज्ज गोरखपुर च उत्तर प्रदेश दे पैहले महायोगी गुरु गोरखनाथ आयुष विश्वविद्यालय दा उद्घाटन करगन। 52 एकड़ च बने दे इस विश्वविद्यालय च 267 करोड़ रपे थमां मते दा खर्च होए दा ऐ। राज्यपाल आमंदी बेन पटेल ते मुख्यमंत्री योगी आदित्यनाथ बी इस मौके पर शामिल होंगन। राष्ट्रपति होरें युवा डाक्टरें गी समाज दे उनें तबकें आसतै कम्म करने लेई आग्रह कीता ऐ, जिनें चिकित्सा सेवाएं दी बड़ी गै मती लोड़ ऐ। कल गोरखपुर च अखिल भारतीय आयुर्विज्ञान संस्थान दे पैहले दीक्षांत समारोह गी संबोधत करदे होई उनें आखेआ जे मुखे दे विकास च डाक्टरें दा बड़ा महत्वपूर्ण योगदान ऐ, की जे ओह नां छड़ेबमारिणं दा इलाज करदे न, बलके इक स्वस्थ समाज दी नीह बी रखदे न। राष्ट्रपति होरें आखेआ जे डाक्टरें गी बड़ी सारी चुनौतिणं दा सामना करना पौंदा ऐ। राष्ट्रपति होरें आखेआ जे अखिल भारतीय आयुर्विज्ञान संस्थान मुखे दी चिकित्सा समर्थ दा प्रतीक ऐ, जित्थें हर मरीज गी मेद दी किरण दिखने गी मिलदी ऐ। उनें आखेआ जे इनें चिकित्सक शिक्षा, अनुसंधान ते उपचार दे क्षेत्र च उच्चे स्तरै पर मानक स्थापत कीते न। उनें इब्बी आखेआ जे भारत च चिकित्सा उपचार बाकी मुखे दी तुलना च काफी सस्ता ऐ ते इयै कारण ऐ जे मुखे च चिकित्सा गी बढ़ावा मिली सकदा ऐ।

<><><><><><>

Railway Fair

रेल मंत्रालय नै यात्री रेल सेवाएं दे बुनियादी किराएं च तब्दीली कीती ऐ जेहड़ी अज्जै थमां लागू होग। गैर एसी मेल ते एक्सप्रेस ट्रेनें दे किराएं च 1 पैहा फही किलोमीटर ते एसी क्लास लेई 2 पैहे दी किलोमीटर दा बाद्धा कीता गेआ ऐ। मंत्रालय नै आखेआ ऐ जे इक पास्से दी यात्रा लेइ लोकल ट्रेनें दे किराएं च ते माहवार टिकटें च कोई बाद्धा नेई कीता गेआ ऐ। एहदे अलावा रिसर्वेशन फीस सुपरफास्ट प्रभार ते होरने शुल्कें च कोई बी बदलाव नेई कीता जाग। इस पैहलकदमी दा मकसद रेल किराएं गी युक्तिसंगत बनाना ते यात्री सेवाएं लेई माली स्थिरता गी बेहतर बनाना ऐ।

<><><><><><>

IMD

मौसम विभाग ने इस महीने यानि जुलाई 2025 च पूरे मुखे च औसत बरखा सामान्य लम्मी अवधि दे औसत थमां 106 फीसद मती होने दे आसार दस्से न। इक वर्चुअल प्रेस कांफ्रेंस च मौसम विभाग दे डरैक्टर होरें जानकारी दित्ती ऐ जे जुलाई च मुखे दे मते सारे हिस्सें च सामान्य ते सामान्य थमां मते स्तर दी बरखा होई सकदी ऐ। तोआई उत्तर-पूर्वी ते पूर्वी भारत ते भलेयां प्रामदवीतियदे मते सारे क्षेत्रे च ते पच्छम उत्तर भारत दे किश क्षेत्रे च सामान्य थमां घट्ट स्तर दी बरखा होई सकदी ऐ।

<><><><><><>

Delhi Vehicle

दिल्ली च अज्ज थमां पेट्रोल कन्ने चलने आली 15 ब'रे कोला परानी गड्डी ते डिजल कन्ने चलने आली 10 ब'रे कोला परानी गड्डीएंगे गी ईधन नेई दित्ता जाग। दिल्ली सरकार नै ऐसी गड्डीयां जिंदी मयाद पूरी होई चुकी दी ऐ। उंदे च तेल नेई भरने गी जकीनी बनाने आस्तै दिशा-निर्देश जारी कीते ते कन्ने गै पेट्रोल पंप आलें गी आखेआ ऐ जे ओह इयै जनेह मोके दा पूरा साहब कताब रखन ते जिसलै ओ परानी गड्डीएंगे गी लेइयै औन ते उनेंगी तेल देने आस्तै मना करन। दिशा निर्देशे च एह बी दस्सेआ जे सीएनजी कन्ने चलने आली गड्डीएंगे गी ईधन भरने आस्तै मना नेई कीता जाग। एह गैह पुट्टने दा मकसद परानी होइ चुकी दी गड्डीएंगे गी ईधन दी मनाई करियै ब्हा दी गुणवत्ता गी सुधारना ऐ।

<><><><><><>

Amit Shah

केन्द्री गृहमंत्री अमित शाह होरें नमीं दिल्ली च बक्ख-बक्ख राज्ये ते केन्द्र शासत प्रदेशे दे सहकारी मंत्रिएं कन्ने मंथन बैठक रखी। एह आयोजन अंतर्राष्ट्रीय सहकारी ब'रे 2025 गी मनाने लेई कीता गेआ। इस मंथन बैठक दा मकसद मुखे च चला'रदे अभियाने दी समीक्षा करना हा तां जे भारत च सहकारी आंदोलन गी होर मजबूत कीता जाई सकै ते बक्ख-बक्ख उपलब्धिएं दा आंकलन कीता जाई सकै। एहदा मकसद सैहयोग गी बढ़ावा देने लेई गतिशील मंच प्रदान करना बी ऐ। अमित शाह होरें आखेआ जे प्रधानमंत्री नरेन्द्र मोदी होरें सहकारी मंत्रालय गी स्थापत कीता हा, जेहदा मकसद मुखे च सैहयोग दी बढ़ी गै परानी परम्परा गी परतियै उजागर करना हा।

<><><><><><>

Quad Mission

हिंद प्रशांत क्षेत्र च समुंद्री सैहयोग बधने दी रणनीतिक पैहल च भारत, जापान, अमरीका ते आस्ट्रेलिया दे तटरक्षके आस्सेआ पैहला क्वाड समुंद्री मिशन शुरू कीता गेआ ऐ। विलमिंग्टन घोषणा दे तैहत चलाए जा'रदे इस मिशन च महिला अधिकारिएं सनें हर देश दे दऊं-दऊं अधिकारी शामिल होंगन। क्वाड देश बश्कार कर्मे कारवाइएं दे संचालन ते तालमेल बधाने दी बत्तै पर एह इक महत्वपूर्ण गैह साबत होग। एहदा उद्देश्य इस क्षेत्र च सांझी जागरूकता, इकजुटता ते आपू च तालमेल गी बढ़ावा देना ऐ। पिछले ब8रे सितम्बर महीने क्वाड नेताएं दे शिखर सम्मेलन च विशेष अभियान गी चलाने दा फैसला लैता गेआ हा।

<><><><><><>

Jaishankar

विदेश मंत्री डॉ. एस.जयशंकर होर अज्ज अमरीका दे वाशिंग्टन डीसी च क्वाड दी बैठक च हिस्सा लेंगन। विदेश मंत्रालय नै दस्सेआ ऐ जेह क्वाड संगठन दे विदेश मंत्री इस ब'रे 21 जनवरी गी विदेश मंत्रिएं दी पिछली बैठक च होई दी गल्लबात गी अगड़े बंधगन। क्षेत्रीय ते वैश्विक घटनाक्रमे, विशेष रूप थमां हिंद प्रशांत क्षेत्र कन्ने सरबंधत घटनाक्रमे पर बी चर्चा होग। इस ब'रे होने आले क्वाड शिखर सम्मेलन गी दिखदे होई हुनै तोड़ी पैहलु पर होई दी बढ़ोतरी दी बी समीक्षा कीती जाग। विदेश मंत्रालय दे इक ब्यान च आखेआ गेआ जे क्वाड मुखे दे विदेश मंत्रिएं दे बश्कार स्वतंत्र ते मुक्त हिंद प्रशांत क्षेत्र पर सांझा दृष्टिकोण अगड़ा बधाने दे नमें प्रस्तावे पर बी गल्लबात होने दी मेद ऐ।

Jaishankar Terrorism

विदेश मंत्री डॉ. एस.जयशंकर होरें आखेआ ऐ जे आतंकवाद जित्थें कुदरै बी होए शांति लेई ओ इक गंभीर खतरा ऐ। उनें आखेआ जे आतंकवाद गी बढ़ावा, समर्थन ते आसरमा देने आले मुखें गी दोषी करार दित्ता जाना लोड़चदा ते इंदी खुल्लियै निंदेया कीती जानी लोड़चदी। न्यूयार्क च संयुक्त राष्ट्र मुख्यालय च द हयूमन कोस्ट ऑफ टेररिजम नमैश दा उद्घाटन करदे मौके उनें आखेआ जे आतंकवाद भाएं कुसै बी सूरतै च ऐ ओ संयुक्त राष्ट्र दे नियमें, सिद्धांतें ते उद्देश्यें कन्नै कुतै मेल नेई खंदा ते जिसलै कोइ गोआंढी मुखे आस्सेआ अपने कन्नै आले मुखे च आतंकवाद गी बढ़ावा दित्ता जंदा ऐ, तां ओहदा खात्मा करना अत्त जरूरी होई जंदा ऐ। उनें आखेआ जे एह बड़ी खरी गल्ल ऐ जे संयुक्त राष्ट्र सुरक्षा परिष नै पहलगाम आतंकी हमले दी निंदेया कीती ते दोषिएं गी सजा दोआने दी मंग बी कीती। उनें आखेआ जे आतंकवाद दे पूरी चाल्ली खात्मे लेई दुनिया गी इक जुट होई जाना लोड़चदा।

<><><><><><>

Football

विद्यार्थिएं च फुटबाल दे प्रति रूची ते मजबूत संस्कृति गी बढ़ावा देने तांई स्कूलें च तकरीबन 10 लक्ख फुअबाल बंडे जांगन। केन्द्रीय शिक्षा मंत्री धर्मेन्द्र प्रधान होरें कोलकाता च फोर्ड विलियम दे पीएमश्री केन्द्रीय विद्यालय च इस अभियान दी घोषणा कीती। उनें आखेआ जे पच्छिम बंगाल च गै 88 जहार फुटबाल बंडे जांगन जेहदे कन्नै तकरीबन 15—16 लक्ख विद्यार्थिएं गी फायदा होग।

<><><><><><>